



Uunga siunnersuut: Uranimik il.il. misissueqqaarnermut, ujaasinermit piiaanermullu inerteqquteqarneq pillugu Inatsisartut Inatsisaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiisitaanermullu Naalakkersuisoq)

(Siullermeerneqarnera)

Aallaqqaasiutitut ersarissumik aaliangersassavara, innuttaasut isumannaatsuunissaat peqqinnissaallu Demokraatit pingaernerpaajummat. Pilersaarutitut tamanut atuuppoq – aatsitassanuinnaangitsoq, tamanulli. Piiaanernut akuersissutinik tunisinissanut peqataarusunngilagut sukumiisumik misissuinerit takutippassuk, aatsitassarsiornissaq inunnut, avatangiisinut peqqinnissamulluunniit ulorianaateqartoq.

Isumaqanngilagulli, aatsitassat pitsaasut pitsaanngitsullu immikkoortinneqassasut, soorlu uani taamaaliorusuttoqartoq, politikikkut aaliangerlugu, uran pitsaanngitsuusoq. Akerlianik isumaqarpugut, pisoq naammassisassatut isigineqarnerusariaqaraluartoq aammalu assersuutigalugu aaliangerlugu, uranimik piiaaneq nunatta avataani pissasoq.

Killilerujussuarmik siunnersuuteqarnerup ajornartorsiutigaa, uran aammalu radiup qinngorneranik akullit pingortitami sumi tamaani immata. Taamaattumillu siusinaarluni oqartoqarsinnaanngilluinnarluni, ujarlernermit taakku siumorneqarsinnaanersut.

Tamannaluuna tunngavigalugu Demokraatit ersarissumik nalileraat, una siunnersuut aatsitassanut siunissami aningaasaliisussanut annertuumik killiliisinnaammat. Amerlajunnaangillat, misissuineritut aningaasarpassuarnik aningaasaleerusuttut, kingunerissappagu una inatsit malillugu piiaanissamut itigartinneqassappata saffiugassaq uranimik annertuallaamik akoqarsimanerata kingunerisaanik. Suli ajornerusaaq, Naalakkersuisut imminnut pisinnaatippata qanorluunniit radiup qinngorneranik akulinnik arlaannaanilluunniit inerteqquteqarnissaminut.

Tamaat isigalugu una siunnersuut aatsitassarsiornernut aallarlerlaanut tamanut annertuumik saassussineruvoq, piioneerussinnaasoq, taassumalu ersarissumik apererusulersippaanga; siunissami suna inuussutigissagatsigu?

Qujanartumik pikkorissunik aalisartortaarpugut, tassannga inuussutissarsiummik pitsaasumik isertitaqarnissamik qulakkeerinnittunik. Inatsisartuusimasut amerlanerussuteqartut qujanartumik takorluuisinnaassuseqarsimapput annertuumik aningaasaliinissaminut mittarfissuarnut, taassumalu kingunerissavaa, immaqa ullumikkorniik takornariaqarnermit annertunerusunik aningaasanik isaatitsinissarput. Taamaangippammi taava?

Innuttaasut inuuniarnermikkut pitsaanerusumik inuuneqarnissaat tamatta kissaatigaarput. Utoqqaat pitsaanerusumik inuuneqartikkusuppagut. Peqqinnissaqarfik pitsaanerusoq kissaatigaarput. Meeqqanut



sumiginnakkanut ikiuiniarluta iliuuseqarnerorusuppugut. Allarpassuarnik pitsaasunik iliorusuppugut. Pitsaasulli tamarmik akeqarput. Uuma siunnersuutip kingunerissavaa, aningaasanik ikinnernik naatsorsuutigisatsinnit pissarsinissarput, tamannalu isumaqarpoq, inuunerissaarnissap pitsanngorsarnissaanut, tamatta piумаqisatsinnut, akissaqannginnerulerneq. Tamannalu eqqarsarluarnerunngilaq.

Nalunngilara, innuttaasut amerlanersaasa paasitereeraat, Kuannersuarni aatsitassarsiornissaq kissaatiginagu. Naapertuulluinnarpoq. Isumaqarluinnarpungali, taakku inuit utoqqaat, napparsimasut, innarluutillit meeqqallu atugaasa pitsaanerulernissaat aamma kissaatigigaat. Tamattami taama kissaateqarpugut.

Politikkeritut suliassaraarput suliassat oqimaalutarnissaat, inernerillu pitsaanerpaat isumatusaarnerpaallu naniniassallugit. Suliamut tassunga Naalakkersuisut ajorsarput uuma siunnersuutip saqqummiunneratigut, qularnanngilluinnartumik aatsitassarsiornermi aningaasaliisussanik qammaanissamut ajornakusoortitsisorujuusussaq.

Piviusorsiorluta eqqarsartariaqarpugut aningaasatigullu ineriartornissatsinnut uatsinnut naallerarnerput unitsillugu, taamaaliussagattami una siunnersuut akuerineqassapat.

Taamatut oqaaseqarluta siunnersuutip itigartinneqarnissaa innersuussutigaarput.